

Tieneno non sia molto richo, et esser passato de qui per qualche debito l' ha. Dimandano 20 miara di prede per compir il pozo, et do miara di tavole per il castello per conzar li coperti dove dete la sayta.

*Del ditto, di 6 Septembrio.* Avisa del zonzer qui il capitano del Golfo venuto per haver biscoti. A di 4 partino le galie di Baruto per andar al suo viazo, nè altro è di novo.

*Di Napoli di Romania, di sier Bernardin Contarini baylo et Consieri, date a di 14 Avosto.* Come a di 12 zonse li il proveditor di l'armata con do galie candiote Bona et Barbariga, et va conzar le fuste turchesche per consignarle a Negroponte.

*Di sier Antonio Marzello capitano di le galie bastarde, date a Cerigo, a di 20 Luio.* Come, iusta la comission sua, ha fatto la zerca a le tre galie è con lui et le manda etc.

*Da Constantinopoli, di sier Piero Zen vice baylo, di primo Avosto.* Scrive contra sier Piero Bragadin fo baylo de li zerca li ducati 500 trete, cargandolo assai, che 'l fece prometer a Lorenzo Belochio ducati 130 per lui etc., et manda alcune deposition tolte per esso sier Piero Zen contra dito sier Piero Bragadin, et si dà titolo di Orator, *tamen* è vice Baylo etc.

434 *Copia de una lettera scritta in Xagabria per pre' Stefano de Posedaria a conte Jurcho so fradello, data a di 28 Avosto 1526.*

Egregio conte Jurcho.

Avanti non ve ho possuto dar notitia de le nove de Hongaria. El re de Hongaria se atrova a Muchach, et atorno de lui infino a di 22 de l'istante è stà da combatenti numero 109 milia, et infra questi sono 16 milia per nome de la Regina, che lei ha adunado de zente todesca, et vegnudo Morculab capitano de bohemi et con lui 18 milia bohemi. Ancora se aspectano 9 milia, de zente de Sclavonia sono 15 milia, questi se hanno tragetadi el dì de San Bortolomio oltre la Drava per unirse con el Re. Nel campo del Re sono assai homeni d' arme et schiopetieri, et si porta la spada sanguenada per tutto el regno de Hongaria et Sclavonia, et se in una caxa sono nove homeni da poder portar arme over dui, uno resta a caxa et el resto va in campo. Li signori corvati si sono mossi con el conte Zuane et il conte Christoforo, et si ha bona speranza. Li hongari desiderano haver con loro questi signori corvati. Hozì se ha habuto in Xagabria, che 'l Re ha

preso Cinque chiesie de Ostrogonia, et uno vescovo et uno fiolo di uno baron sono partiti dal campo ongarico et andati dal Gran signor; et se dice cussi ma non lo so certo.

El Gran signor ha preso 15 terre in Serima et ha fatto tre ponti oltra la Drava dove se domanda Osich, et se ha acampado oltra la Drava cinque le-ge ougariche lontan dal campo del Re; ma non se sa de certo se 'l Signor è in persona: el suo campo è afamado et infermo da peste et fluxo. Da poi che l' ha passato oltra l'acqua, el frate arcivescovo *cum* Perin Petar hanno data una rota a la hoste turchesca da 10 milia persone, et ne hanno morti 3 milia et se spera de ben. Pregate Dio, perchè certo fina 10 zorni a la più longa se farà la bataglia.

*Scripta in Xagabria, el di de Santo Augustino 1526.*

Conte Jurcho.

Perchè te scrivo che la Rezina ha fatto zente todescha, *tamen* lei è a Buda, ma le zente se chiama per nome suo esser adunada.

Sottoscritta :

STEPHANO  
vostro fradello.

Ricevuta a di 10 Septembrio *hora prima noctis.*

*Die 10 Septembris 1526, prima hora noctis  
Jadrae.*

Come Piero Paladinich nobel corvato *alias* mandado per li clarissimi rectori di Zara et magnifico Proveditor a la volta de Hongaria per intender da novo di le cose de Hongaria, et zonto in uno loco chiamato Glogoniza de qua de Drava, se infirmò da febre *adeo* che non potè proseguir el viazo; ma romase lì apresso certe so sorelle a farsi governar, et lui mandò in suo loco uno suo fradello chiamato Zuane, et stete a ritornar fina a 25 de Avosto. Qual referite che il re de Hongaria era in uno loco chiamato Muchac, zornate 4 luntan da Buda verso Belgrado, et havea da zente 90 milia, et che la Rezina havea uno campo de 16 milia persone, et de Bohemia era 18 milia, et de Schiavonia 15 milia; et che nel campo de l' hongaro era assaissimo numero de homeni d' arme et gran numero de schiopetieri et 300 boche de artellarie. Et che uno vayvoda de Transilvania se aspectava con 30 milia persone, et che 'l re de Polonia non poteva vegnir in persona